



**Meeqqani inuusuttunilu hashimik imigassamillu atorneerluinerup qanoq pitsaanerpaamik pinaveersimatinnissaanut akiornissaanullu oqallisissiaq aallaavigalugu oqalinnissamut siunnersuut.**

(Inatsisartunut ilaasortat Naaja H. Nathanielsen, Attaviitsoq aamma Agathe Fontain, Inuit Ataqatigiit)

Inuit Ataqatigiit Naaja Nathanielsen Agathe Fontainilu qutsavigiumavaat oqallisissiaannut pingaarutilimmut.

Inuit Ataqatigiinni ikiaroonartoq akiorniarlugu suliniutit assigiinngitsut pilersippagut, isumaqaratta ikiaroonartoq akiortariaqarlugu. Innuttaasut ikiaroonartumik atorneerluinerermikkut ajornartorsiortut katsorsartissinnaanissaat pingaartikkatsigu akeqanngimik katsorsartittarnissaq siunnersuutigivarput. Siunnersuutigut assigiinngitsut maanna Inatsisartuni eqqartorneqareersut inuiaqatigiinni sunniuteqalerput. Taamaammatt meeqqat ikiaroonartumik atorneerluisunngunnginnissaannik suliaqartariaqarnerput maani eqqartussavarput.

Meeqqat inunngorneraniilli pitsaasumik atugaqarnissaat inuiaqatigiinni pisussaaffitta pingaarnersaraat. Angajoqqaanngortussat pitsaasumik aallartiffeqarnissaat aqutissiuussinnaavarput angajoqqaat nukittorsarnerisigut, meeqqaminnik paarsilluarnissamik periarfissaqartissallugit. Soorlu makku pitsanngortissinnaanerlugit nalilersorinnaavagut. Angajoqqaanngorlaat sulinngiffeqarnerisa pitsaanerulersinnissaat, ineqarneq, inuutissarsiuteqarneq pilersuisinnaanerlu.

Ilaqutariit meeraaraateqartut atugaat pitsaasuunngippata tamanna pisortanit arajutsinaveersarneqartariaqarpoq. Meeraaqqap atugarisaata pitsaasuunngissagaluarpat pisortaniit ikiuuttoqarsinnaanera siusissukkut periarfissaasariaqarpoq. Siusissukkut iliuuseqarneq pingaaruteqarluinnarpoq. Ilaqutariit ajornartorsiulerpata siusissukkut ikiorserneqarneratigut meeqqat ajornartorsiulinnginnissaat anguniartuartariaqarparput.

Meeqqat inuusuttullu ikiarootalinnginnissaat, imaluunniit imigassamik atuilinnginnissaat suna tamaat atorlugu anguniartuartariaqarparput. Meeqqat angajoqqaat isertitaat apeqqutaatinnagit sunngiffimmik pitsaasumik periarfissittariaqarpagut. Aammattaaq meeqqat atuartut nukarliit perorsaataasumik nakkutigineqarnissaat qulakkeerniartariaqarparput, sunngiffimmi ornittakkanik neqeroorfiginerisigut.

Ullutsinni pisortat nalunngereertarpaat meeqqat kikkut atorneerluinermut pulasinnaasut. Tassani pisortat, meeqqeriviugunik, atuarfeqarfiugunik sunngiffimmiluunniit sammisaqartitsisuugunilluunniit piaartumik kalerriinissaat pisussaaffilertariaqarparput.

Meeraq aanngajaarniutinik atuilersimappat pisortatigoortumik iliuuseqapallattoqartariaqarpoq. Meeraq angajoqqaavilu neqeroorfigineqarsinnaasariaqarput katsorsartinnissamik. Meeqqap katsorsarnerani angajoqqaat nukittorsartariaqarput meeqqaminnut tapersersuisinnaanngortillugit.

Meeqqanut katsorsaaviit najugaqarfinni periarfissaasariaqassapput. Atuarfeqarfiup, sunngiffimmi sammisaqarfiup isumaginninnerulluunniit iluani aaqqiinnaasariaqarpagut

meeqqamut katsorsaasinnaangorluta. Meeqqamut pillagaaffittut inissisimassanngilaq, ikiortitulli inissisimassalluni.

Angajoqqaat aanngajaarniutunik atuisut katsorsartittullu periarfissaqartariaqarput meerartamik atornerluilersimasut ilaginissaannut, taamaalillutik ilaqutariit tamarmik katsorsartissinnaallutik.

Soorunami paasisitsiniaanerit, meeqqanik oqaloqateqartuarternerit tapersersorpagut. Pingaarnersaavorli meerartatta ikiaroorartumut naaggaarsinnaangorlugit perortinnissaat.

Tamanna pisinnaavoq peqqinnartumik sammisaqartitsinikkut, timersorneruppat nipilersorneruppat, allatulluunniit meeqqat soqutigisaat aallaavigalugit sunngiffiuppat. Meeqqat sammisassaat kajuminnartuutillugillu toqqissisimasuutittuartaqarparpagut. Inuiaqatigiit meeqqat suffissaannik, ilinniarfissaannik annertunerusumik periarfissiisariaqarnerat pingaartipparput.

Meeqqat erligisagut atornerluinermut sernigisigit.

Inatsisartut oqaaseqaatissaannut siunnersuut ima ittoq taperserniarparput:

Hashimik imigassamillu atornerluineq Inatsisartuniit akuerisinnaangilluinnarparput. Meeqqat inuusuttullu atornerluisuunerat pineqartillugu tamanna sakkortuneruleriaannarpoq. Meeqqat inuusuttullu akornanni atornerluisuunerisa paasineqaannarneranniit sukkanerpaamik katsorsarneqarnissamik neqeroorfigineqartarnissaannik Inatsisartuniit kaammattuivugut.